

REGIONAL NEWS UNIT
ALL INDIA RADIO, AGARTALA
Date: 19-03-2024
Time: 07:55-08:05 PM Hrs
BENGALI EVENING BULLETIN

Headlines :

- (১) নির্বাচন কমিশন অষ্টাদশ লোকসভা নির্বাচনের প্রথম পর্যায়ের ভোট গ্রহণের জন্য আগামীকাল আনুষ্ঠানিকভাবে বিজ্ঞপ্তি জারি করবে ।
- (২) নেশা মুক্ত ভারত অভিযানের অঙ্গ হিসাবে আজ উত্তর ত্রিপুরা জেলা শাসক কার্যালয়ে সাক্ষর অভিযান অনুষ্ঠিত হয় ।
- (৩) সুপ্রিমকোর্ট আজ নাগরিকত্ব সংশোধনী আইন, CAA বাস্তবায়নে স্থগিতাদেশ দিতে অস্বীকার করেছে ।
- (৪) নাগাল্যান্ডে আয়োজিত তৃতীয় উত্তরপূর্ব গেমসে ত্রিপুরা দ্বিতীয় দিনে দুটি পদক পেয়েছে ।

CEO-PRESS MEET :

নির্বাচন কমিশন অষ্টাদশ লোকসভা নির্বাচনের প্রথম পর্যায়ের ভোট গ্রহণের জন্য আগামীকাল আনুষ্ঠানিকভাবে বিজ্ঞপ্তি জারি করবে। প্রথম পর্যায়ে আগামী ১৯শে এপ্রিল পশ্চিম ত্রিপুরার লোকসভা আসনের ভোট গ্রহণ করা হবে। একইদিনে রামনগর

বিধানসভা কেন্দ্রে উপনির্বাচন অনুষ্ঠিত হবে। এই উপনির্বাচনের জন্যও আগামীকাল বিজ্ঞপ্তি জারি করা হবে। আজ আগরতলায় এক সাংবাদিক সম্মেলনে রাজ্যের মুখ্য নির্বাচনী আধিকারিক পুনিত আগরওয়াল এসংবাদ জানান। তিনি জানান, আগামীকাল পশ্চিম ত্রিপুরা লোকসভা আসনের নির্বাচন ও রামনগর বিধানসভা কেন্দ্রের উপনির্বাচনের বিজ্ঞপ্তি জারির পর আগামীকাল থেকেই মনোনয়নপত্র গ্রহণ করা হবে। মনোনয়নপত্র জমা দেবার শেষ তারিখ আগামী ২৭শে মার্চ। মনোনয়নপত্র পরীক্ষা করা হবে আগামী ২৮শে মার্চ। মনোনয়ন পত্র প্রত্যাহারের শেষ দিন আগামী ৩০শে মার্চ। পূর্ব ত্রিপুরা উপজাতি সংরক্ষিত লোকসভা আসনের নির্বাচনে বিজ্ঞপ্তি জারি করা হবে আগামী ২৮শে মার্চ। মনোনয়নপত্র জমার শেষ দিন আগামী চৌঠা এপ্রিল। মনোনয়নপত্র পরীক্ষা করা হবে ৫ই এপ্রিল, এবং মনোনয়নপত্র প্রত্যাহারের শেষ দিন ৮ই এপ্রিল। ভোট গ্রহণ করা হবে আগামী ২৬শে এপ্রিল।

মুখ্যনির্বাচন আধিকারিক আরো জানান, রাজ্যে দুটি লোকসভা আসনে মোট ভোটার ২৮ লক্ষ ৫৭ হাজার ৯৯৬। এর মধ্যে পশ্চিম ত্রিপুরা সাধারণ আসনে মোট ভোটার ১৪ লক্ষ ৬২ হাজার ৮৭৫ এবং পূর্ব ত্রিপুরা লোকসভা আসনে মোট ভোটার ১৩ লক্ষ ৯৫ হাজার ১২১। অপরদিকে, রামনগর বিধানসভা কেন্দ্রে ভোটার রয়েছেন, ৪৫ হাজার ৬৬৯। এবার ৮৫ বছর বা তার উর্ধে বয়সীরা বাড়ি থেকে ভোট দিতে পারবেন এমন ভোটার রয়েছেন, ১৮ হাজার ৬৭৬। দিব্যাঙ্গ ভোটার রয়েছেন ১৯ হাজার ৮৬৬। তিনি জানান, রাজ্যে ১৮ থেকে ১৯ বছর বয়সী প্রথম ভোটার রয়েছেন ৬৯ হাজার ৭৮২। মোট ভোট গ্রহণ কেন্দ্র ৩৩৪৯টি।

Signature Campaign :

নেশা মুক্ত ভারত অভিযানের অঙ্গ হিসাবে আজ উত্তর ত্রিপুরা জেলা শাসক কার্যালয়ে সাক্ষর অভিযান অনুষ্ঠিত হয়। উত্তর ত্রিপুরা নেহরু যুব কেন্দ্রের সহায়তায় এবং উদ্ভাবনী সামাজিক সংস্থার ব্যবস্থাপনায় আয়োজিত সাক্ষর অভিযান অনুষ্ঠানের সূচনা করেন জেলাশাসক দেবপ্রিয় বর্ধন। উপস্থিত ছিলেন, অতিরিক্ত জেলাশাসক বিপ্লব দাস, মহকুমা শাসক অমিত চন্দ্র, কালাছড়ার বিডিও কুনাল গৌতম, নেহরু যুব কেন্দ্রের জেলার যুব আধিকারিক সঞ্জীব দাস প্রমুখ।

উল্লেখ্য জেলাভিত্তিক নেশা মুক্ত ভারত অভিযানের এই কার্যক্রমে নেহরু যুব কেন্দ্র এবং উদ্ভাবনী সামাজিক সংস্থার উদ্যোগে এবং জেলা প্রশাসনের সহযোগিতায় ইতিমধ্যে দশদা, কাঞ্চনপুর, দামছড়া, ধর্মনগরের বিভিন্ন জায়গায় আলোচনা শপথ গ্রহণ, বক্তৃতা প্রতিযোগিতা, ওপেন কুইজ প্রতিযোগিতা, ফুটবল, ভলিবল, মিউজিকাল চেয়ার, ধামাইল প্রতিযোগিতা ইত্যাদি কর্মসূচি অনুষ্ঠিত হয়।

CM-Teliamura :

বিজেপি তেলিয়ামুড়া মন্ডলের উদ্যোগে আজ তেলিয়ামুড়া টাউন হলে পৃষ্ঠা প্রমুখ সম্মেলন অনুষ্ঠিত হয়। সম্মেলনে উপস্থিত ছিলেন মুখ্যমন্ত্রী অধ্যাপক ডা: মানিক সাহা, বিজেপি রাজ্য সভাপতি রাজীব ভট্টাচার্য, সরকারী মুখ্য সচিব কল্যাণী রায়, রাজ্য পৃষ্ঠা প্রমুখ ইনচার্জ সুবল ভৌমিক। সম্মেলনে মুখ্যমন্ত্রী বলেন, পৃষ্ঠা

প্রমুখরাই ভারতীয় জনতা পার্টির মূল শক্তি। বুথস্তর পর্যন্ত সংগঠনকে শক্তিশালী করার ক্ষেত্রে তাদের অবদান অনস্বীকার্য।

SP Sepahijala-Election :

সিপাহীজলা জেলার পুলিশ সুপার বি জে রেড্ডি জেলায় প্রতিটি রাজনৈতিক দলকে নির্ভয়ে ভোট প্রচার করার জন্য আবেদন করেছেন। আজ সোনামুড়া থানায় সাংবাদিকদের বিভিন্ন প্রশ্নের উত্তর দিতে গিয়ে পুলিশ সুপার এই আবেদনের কথা উল্লেখ করেন। তিনি জানান, লোকসভা নির্বাচন অবাধ ও শান্তিপূর্ণ করার জন্য ব্যাপক নিরাপত্তা ব্যবস্থা গ্রহণ করা হয়েছে। ইতিমধ্যে সিপাহীজলা জেলায় পর্যাপ্ত সংখ্যক কেন্দ্রীয় বাহিনী পৌঁছে গেছে। পুলিশ সহ তারা প্রতিদিন জেলার অন্তর্গত বিভিন্ন এলাকায় রোড মার্চ করছে। জেলার অন্তর্গত আন্তর্জাতিক সীমান্ত এলাকায় বি.এস.এফের নজরদারি বাড়ানো হয়েছে। পুলিশ সুপার আরো জানান, প্রশাসনের বৈধ অনুমতিপ্রাপ্ত কোন রাজনৈতিক প্রচার অভিযানে কেউ বাধা দিলে আইনানুগ ব্যবস্থা নেওয়া হবে।

Press Conference-Lok Sabha Elections :

খোয়াই জেলার জেলা শাসক চাঁদনী চন্দ্রন আজ এক সাংবাদিক সম্মেলনে জানিয়েছেন, এই জেলায় নির্বাচন অবাধ ও শান্তিপূর্ণভাবে সম্পন্ন করার জন্য প্রয়োজনীয় সব ধরনের ব্যবস্থা গ্রহণ করা হয়েছে। জেলার পুলিশ সুপার রমেশ কুমার যাদব জানিয়েছেন, গোটা জেলায় ১৮টি নাকা পয়েন্ট বসানো হয়েছে। জেলার বিভিন্ন স্থানে প্রতিদিন চলছে ফ্ল্যাগ মার্চ। মোট আট

কোম্পানি কেন্দ্রীয় বাহিনী ইতিমধ্যে খোয়াই জেলায় পৌঁছে গেছে। সাংবাদিক সম্মেলনে জেলাশাসক জানান, লোকসভা নির্বাচনে খোয়াই জেলায় মোট ভোটারের সংখ্যা ২ লক্ষ ৫৪ হাজার ৪০১জন। এরমধ্যে পুরুষ ভোটার ১ লক্ষ ২৭ হাজার ৭৩১ জন এবং মহিলা ভোটার সংখ্যা ১ লক্ষ ২৬ হাজার ৬৭০ জন। ৮৫ বছরের উর্ধ্ব ভোটার রয়েছে ১৭৩৬ জন।

Supreme Courte :

সুপ্রিম কোর্ট আজ নাগরিকত্ব সংশোধনী আইন, CAA বাস্তবায়নে স্থগিতাদেশ দিতে অস্বীকার করেছে। গত সপ্তাহে প্রজ্ঞাপিত আইনটিকে চ্যালেঞ্জ করে ২৩৭টি পিটিশনের জবাব দিতে সর্বোচ্চ আদালত সরকারকে তিন সপ্তাহ সময় দিয়েছে।

প্রধান বিচারপতি ডিওয়াই চন্দ্রচূড়, বিচারপতি জেবি পাদরিওয়াল্লা এবং বিচারপতি মনোজ মিশ্র এই বিষয়ে শুনানি করেন। আবেদনকারীদের মধ্যে রয়েছে, ইন্ডিয়ান ইউনিয়ন মুসলিম লীগ, কংগ্রেস নেতা জয়রাম রমেশ এবং তৃণমূল কংগ্রেসের মল্লিকা মিত্র। এই মামলার পরবর্তী শুনানির দিন ধার্য করা হয়েছে আগামী ৯ এপ্রিল।

Loksabha Election-Kailashahar :

২নং পূর্ব ত্রিপুরা সংসদীয় আসনের অন্তর্গত ঊনকোটি জেলার কৈলাশহরে আজ বিভিন্ন রাজনৈতিক দলের প্রতিনিধিদের নিয়ে এক সর্বদলীয় বৈঠক অনুষ্ঠিত হয়।

কৈলাশহর S.D.M এর অফিসকক্ষে দুপুরে আয়োজিত বৈঠকে সভাপতিত্ব করেন, ২নং পূর্ব ত্রিপুরা সংসদীয় আসনের সহকারী রিটার্নিং অফিসার তথা কৈলাশহরের S.D.M প্রদীপ সরকার। উপস্থিত ছিলেন, কৈলাশহরের S.D.P.O জয়ন্ত কর্মকার, কৈলাশহর ও ইরাণি থানার ওসি'রা।

এখানে B.J.P, কংগ্রেস, তৃনমূল কংগ্রেস, C.P.I (M, তিপরা মথা দলের প্রতিনিধিরা অংশ নেন।

বৈঠকে নির্বাচন কমিশন প্রণীত আদর্শ আচরণ বিধি কঠোরভাবে মেনে চলার উপর গুরুত্বারোপ করা হয়। তাছাড়া রাজনৈতিক দলগুলো তাঁদের প্রচারের জন্য অনলাইনে কিভাবে অনুমতির আবেদন করবেন এবিষয়ে অবহিত করা হয়। তাছাড়া সুষ্ঠু ও শান্তিপূর্ণ নির্বাচন পর্ব সম্পন্ন করতে সংশ্লিষ্ট সকলের সহযোগিতা কামনা করা হয়।

এক একান্ত সাক্ষাৎকারে সহকারী রিটার্নিং অফিসার তথা কৈলাশহরের মহকুমা শাসক প্রদীপ সরকার জানান, আসন্ন লোকসভা নির্বাচনকে সুচারুভাবে সম্পন্ন করার লক্ষ্যে প্রশাসনিক প্রস্তুতিপর্ব চলছে।

Biplab Deb :

আগরতলার টাউন হলে আজ লোকসভা নির্বাচনের পশ্চিম ত্রিপুরা আসনে বিজেপি মনোনীত প্রার্থী বিপ্লব কুমার দেবের সমর্থনে বিজেপি সদর শহর ও গ্রামীণ জেলার উদ্যোগে সাংগঠনিক বৈঠক অনুষ্ঠিত হয়। উপস্থিত ছিলেন প্রার্থী বিপ্লব কুমার দেব, পুর মেয়র দীপক মজুমদার, দলের সহ সভাপতি তাপস ভট্টাচার্য,

বিজেপি নেত্রী পাপিয়া দত্ত সহ অন্যান্য কার্যকর্তারা। বৈঠকে সাংগঠনিক বিভিন্ন বিষয় সহ লোকসভা নির্বাচনে দলের বিভিন্ন পরিকল্পনা নিয়ে আলোচনা করা হয়।

বিপ্লব কুমার দেবের সমর্থনে আজ মোহনপুরে একটি বাইক রেলি অনুষ্ঠিত হয়। উপস্থিত ছিলেন প্রার্থী শ্রী দেব সহ বিদ্যুৎমন্ত্রী তথা এলাকার বিধায়ক রতনলাল নাথ। তাছাড়া মোহনপুরে একটি সাংগঠনিক বৈঠকেও অংশ নেন প্রার্থী শ্রী দেব।

শ্রী দেব আজ আগরতলায় আইপিএফটি নেতাদের সঙ্গে বৈঠক করেছেন। বৈঠকে আইপিএফটি দলের সভাপতি প্রেমকুমার রিয়াং সহ অন্যান্য নেতারা উপস্থিত ছিলেন। শ্রী দেব জানান, আগামীদিনের পরিকল্পনাসহ বিভিন্ন বিষয়ে তাদের মধ্যে আলোচনা হয়েছে।

CPIM :

রামনগর বিধানসভা কেন্দ্রের উপনির্বাচনের ইন্ডিয়া জোট তথা বামফ্রন্ট প্রার্থী রতন দাস আজ বাড়ি বাড়ি প্রচার শুরু করেছেন। বাম কংগ্রেস কর্মী-সমর্থকরা মিলিতভাবে এ প্রচার অভিযান অংশগ্রহণ করেন। আজ জয়নগর পিয়ারী বাবুর বাগান এলাকায় বাড়ি বাড়ি প্রচার কর্মসূচি শুরু হয়। জয় সম্পর্কে আশাবাদী বাম প্রার্থী রতন দাস বিজেপির সমালোচনা করেন।

BJP meeting Udaipur :

বিজেপি গোমতী জেলা কমিটির উদ্যোগে আজ উদয়পুর রাজর্ষি কলাক্ষেত্রে এক সাংগঠনিক সভা অনুষ্ঠিত হয়। সভায় উপস্থিত ছিলেন অর্থমন্ত্রী প্রণজিৎ সিংহ রায়, বিধায়ক অভিষেক দেবরায়, আর কে পুর মন্ডল কমিটির কার্যকর্তাগণ, বুথ সভাপতি, শক্তিকেন্দ্রের ইনচার্জ, বিভিন্ন মোর্চার সভাপতি ও সাধারণ সম্পাদকগণ।

BJP-South :

লোকসভা নির্বাচনকে সামনে রেখে আজ মনু, জোলাইবাড়ি ও ঋষ্যমুখ মন্ডলে বিজেপির সাংগঠনিক সভা অনুষ্ঠিত হয়। এই সভাগুলিতে উপস্থিত ছিলেন বিধায়ক মাইলাফরু মগ, বিজেপির দক্ষিণ জেলা সভাপতি শংকর রায়।

Seized forest items :

বন দপ্তরের কর্মীরা আজ এক অভিযান চালিয়ে বিশালগড় মহকুমার কামথানা এলাকায় বিপুল পরিমান কাঠের লগ, অবৈধ স-মিল, জেনারেটর ও ২টি গাড়ি বাজেয়াপ্ত করেছে। সিপাহীজলা জেলার বনাধিকারিক সুমিত দেব আজ এখবর জানিয়েছেন।

Arunachalpradesh :

সরকার বলেছে যে অরুণাচল প্রদেশ ভারতের অবিচ্ছেদ্য অংশ ছিল, আছে এবং থাকবে। অরুণাচল প্রদেশ সম্পর্কে চীনা প্রতিরক্ষা মন্ত্রকের মুখপাত্রের মন্তব্যের উপর সাংবাদিকদের প্রশ্নের

জবাবে, বিদেশ মন্ত্রকের মুখপাত্র রণধীর জয়সওয়াল বলেছেন, অরুণাচল প্রদেশের জনগণ উন্নয়ন কর্মসূচি এবং সরকারের বিভিন্ন প্রকল্প থেকে উপকৃত হবে। তিনি বলেন, এই বিষয়ে ভিত্তিহীন যুক্তির পুনরাবৃত্তি এই ধরনের দাবির কোন বৈধতা প্রমাণ করে না।

Anti-drug operation-Sonamura :

পুলিশ ও বিএসএফ-এর যৌথ বাহিনী গতকাল গভীর রাতে সোনামুড়ার রবীন্দ্রনগর এলাকায় অভিযান চালিয়ে ৭০ হাজার ইয়াবা ট্যাবলেট, নগদ ২ লক্ষ ২৩ হাজার ৮০০ টাকা ও একটি দামি গাড়ি উদ্ধার করেছে। উদ্ধারকৃত ইয়াবা ট্যাবলেটের বাজার মূল্য আনুমানিক দেড় কোটি টাকা। এই অভিযানে নেতৃত্ব দেন সোনামুড়া মহকুমা পুলিশ আধিকারিক শশীমোহন দেববর্মা, সোনামুড়া থানার ওসি জয়ন্ত কুমার দে ও বিএসএফ ১৫০ নম্বর বাহিনীর শ্রীমন্তপুর বি.ও.পির ইন্সপেক্টর মুকেশ কুমার। এদিকে সিপাহীজলা জেলার পুলিশ সুপার বি.জে রেড্ডি জানিয়েছেন, নেশা সামগ্রী মজুত ও পাচার রুখতে এই ধরনের অভিযান অব্যাহত থাকবে।

Northeast Games :

নাগাল্যান্ডে আয়োজিত তৃতীয় উত্তরপূর্ব গেমসে ত্রিপুরা দ্বিতীয় দিনে দুটি পদক পেয়েছে। এথলেটিক্সে মহিলাদের ১০০ মিটার দৌড়ে ফতেমা বেগম রৌপ্য ও পুরুষদের ১৫০০ মিটার দৌড়ে সৌরভ হোসেন ব্রোঞ্জ পদক পান। এছাড়া ফুটবলের পুরুষ

বিভাগে স্বাগতিক নাগাল্যান্ড ১-০ গোলে ত্রিপুরাকে হারিয়ে দেয়।
ব্যাদমিন্টনের পুরুষ ও মহিলা উভয় বিভাগে দলগত লড়াইয়ে
রাজ্যদল পরাজিত হয়।

Belonia Senior Cricket :

বিলোনিয়া মহকুমা ক্রিকেট এসোসিয়েশন আয়োজিত সিনিয়র
ডাবল লীগ কাম নক আউট ক্রিকেট টুর্নামেন্টের পঞ্চম ম্যাচে
বিলোনিয়ার ওয়াই সি সি জয়ী হয়েছে। আজ বিদ্যাপীঠ মাঠে
অনুষ্ঠিত এই ম্যাচে প্রথমে ব্যাট করতে নেমে ওরিয়েন্টাল ক্লাব
২০ ওভার ২ বলে সব উইকেট হারিয়ে ১১১ রান সংগ্রহ করে।
জবাবে ওয়াই সিসি ২৪ ওভার ১ বলে ৬ উইকেটের বিনিময়ে
১১৫ রান তুলে জয়লাভ করে।

Women's Cricket :

টিসিএ পরিচালিত মহিলাদের আমন্ত্রণমূলক ঘরোয়া টি-২০ ক্রিকেট
প্রতিযোগিতায় একদিনের বিরতির পর আজ পাঁচটি খেলা হয়।
এমবিবি স্টেডিয়ামে ব্লাডমাউথ ক্লাব ৮২ রানে লালবাহাদুর
ব্যায়ামাগারকে এবং ভগিনী নিবেদিত মহিলা সমিতি ৮ উইকেটে
বিদ্যাসাগর কোচিং সেন্টারকে পরাজিত করে। এদিকে, তালতলা
মাঠে দুটি খেলায় এডি নগর কোচিং সেন্টার ৯ উইকেটে নিউ প্লে
সেন্টারকে এবং অপর খেলায় এগিয়ে চলো সংঘ ১৪০ রানে
ক্রিকেট অনুরাগী কোচিং সেন্টারকে হারিয়ে দেয়। অপরদিকে,
মেলাঘরে অনুষ্ঠিত একমাত্র খেলায় জুটমিল কোচিং সেন্টার ১২০
রানে চাম্পামুড়া কোচিং সেন্টারকে পরাজিত করে।

Super Division :

টিসিএ পরিচালিত ঘরোয়া সুপার ডিভিশন লিগ ক্রিকেট প্রতিযোগিতার একদিনের সীমিত ওভারের আসরে আজ অনুষ্ঠিত দুটি খেলায় ইউনাইটেড ফ্রেন্ডস ও জয়নগর ক্রিকেট ক্লাব জয়লাভ করেছে। নরসিংগড়ের পিটিএ মাঠে ইউনাইটেড ফ্রেন্ডস ৮ উইকেটে সংহতি ক্লাবকে এবং টিআইটি মাঠে জয়নগর ক্রিকেট ক্লাব ১৩৩ রানে শতদল সংঘকে পরাজিত করে।

Weather :

আগামীকাল আকাশ সাধারণত মেঘাচ্ছন্ন থাকবে। কিছু কিছু জায়গায় হালকা বৃষ্টিপাতের সম্ভাবনা রয়েছে। তাপমাত্রা সর্বোচ্চ ছাব্বিশ ডিগ্রী এবং সর্বনিম্ন বাইশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল তেত্রিশ দশমিক চার ডিগ্রী এবং সর্বনিম্ন একুশ দশমিক পাঁচ ডিগ্রী সেলসিয়াস। আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বৃষ্টিপাতের সতর্কতা জারি করেছে আবহাওয়া দপ্তর।
